

Apel mwa Tizan

Ti la veil lanwel, le 24 desam. Tififi avek so granmama, ti pe instal zetwal lor zot sapin. Granpapa Roze ti pe fini kwi roti ek kari dan lakwizinn.

Zot tann enn tapaz deor. Laport nek ouver. Isi pa bizin tap laport do! Tantinn Lolo ek bann kouzin Bea, Alex et Babet inn arive.

Enn sware zot amize, bwar, manze, koze, riye. Alors ki bann zanfan pe zwe enba pye flanbwayan, Bolom Nwel inn pase!

Zot oh! Zo'nn gagn ennta kado : poupet, fizi delo, boul football, lakaz zouzou!

Alor ki bann kouzin pe zwe, granpapa kriye Tififi dan lakwizin. Depi mama Tififi finn mor, granpapa gat li plis.

“Pran sa ti kado-la Tififi.”

Tififi ouver so kado ek la, li trouv enn tibolom dibwa. So linz bien sinp ek li pena soulie.

- Monn fer enn poupet dibwa Tizan pou twa, Tififi. Mo kone to biin kontan bann zistwar Tizan. Aster, Tizan pou avek twa toultan !
- Mersi Granpapa !
- Selman pran kont. Tizan li pa ziss enn personaz dan bann zistwar. Li enn vre prins. Lerwa Mangoust inn fer longaniss ek li Tififi. Lerla linn vinn enn ti Bolom dibwa...
-

Tififi ekout so granpapa so lisie gran ouver parey kouma de bonbon kanet.

Enn tigit letan apre, inn ariv ler pou al dormi. Seman Tififi pa pe gagn someil. Linn al bliye Tizan anba sapin. Li leve, marse dousman dousman pou al rod li. Kouma li ariv dan salon, so leker manke arete vouzout! Lerwa Mangoust ek ennta lezot mangoust otour sapin.

Tififi kriye : “Tizan leve!”

Lerla vremen tibolom Tizan dibwa net leve so lans, so sagay, dan so lame. Li zet enn mangoust parsi, li zet enn enn mangoust parla. Lerwa Mangoust, fourb, ti pou frap Tizan lor to letet kan Tififi gagn pou tir so savat dodo ek voltiz li lor li. Li tom sek kouma enn papay pouri. Bye bye Lerwa Mangoust!

Abracadabra ! Tou bann mangoust disparet ek Tizan transform an enn extra zoli garson, so lapo lwizan kouma dibwa deben, enn sagay, enn lans konba dan so lame.

- Vremen vremen mo pa ziss enn personaz kont, Tififi. Lerwa Mangoust ti zet mwa enn sor. Aster mo lib ek mo kapav retourn dan mo pei opre mo fami... Mo fam, mo gate... Mo bann zenfan.... Tififi... Mo enn prins sorti depi Madagascar. Mo vre nom se Ratsitatane me twa, apel mwa Tizan.”

Leker Tififi fer doup doup kouma premie son lor ravann. Li trap lame Tizan, Prins Ratsitatane ek li amenn li anba pie lafours.

- Mersi Tififi. Zame mo pa pou bliye. To finn sap mo lavi.

Tizan monte, monte, monte dan lesiel koumadir enn anz, koumadir enn zetwal, plito kouma dir enn payenke.

- Salam Tififi! Mersi!!!
- Salam Tizan!!!

Landemin gramatin, Tififi leve. Linn gagn somey anba sapin, Tizan tibolom dibwa sere kont so leker. Zame li pa pou bliye zistwar Tizan, Prins Rasitatane.

Sa swar-la, le 25 desam, mo ti la avek Tififi anba pie lafours. Monn trouv Tizan, de so vre nom Prins Ratsitatane, briye dan lesiel kouma enn zetwal. Alor sak fwa ki to trouv enn zetwal briye dan lesiel enn 25 desam, rapel ki Ratsitatane inn retrouv so Madam ek so zanfan.,,pou leternite...